

奩

史

舊史卷四

東吳王初桐于陽寢述

蘭陵孫星衍淵如校刊

夫婦門四

喪妻

夢見鵲居不雙也婦獨居皆失妻也

夢書

彭祖喪四十九妻

粧樓記

莊子妻死箕踞鼓盆而歌

南華經

苻融貧妻亡無以殯斂曰古之葬者棄之中野惟妻

子可以行其志但卽土埋藏而已

後漢書

薛勤喪妻不哭臨殯曰幸不爲夭折復何恨

張璠漢記

扈累喪婦獨居以博爲障施一厨牀食宿其中

魏畧

潘岳誄楊仲武曰德宮之喪謂喪妻也

六帖

王聘之妻謝氏病終旣窆忽空中有嗔聲曰何不

挽歌令我寂寂上道耶

異苑

晉桓道愍喪婦纏痛無已一夕始寢視屏風上見有
人手驚起炳炬照屏風外乃其婦也愍了不畏懼遂
引共卧問曰卿亡來初無音影今夕那得忽還答曰
新婦今當受生爲人故來與君別也至曉涕泣辭去
愍送至步廊下不見

法苑珠林

有道人能令人與死人相見一人願見婦道人曰可
然聞鼓聲當出俄而得見之恩情如生良久聞鼓音
婦出壻閉其衣裾戶間裂絕而去後此人死葬開塚
見婦棺蓋下有斷裾

搜神記

後魏宋穎妻劉氏亡十五年穎夢見之拜曰新婦今
被處分爲高崇妻故來辭君潸然流涕穎且見崇言
之後數日崇卒

北史

魏書及五代新說劉作鄧

隋張崇妻王氏墓銘曰深深送玉鬱鬱埋香

王溪編

賈客張聰將歸夢炊臼中卜者曰君歸不見妻矣曰
中炊無釜也賈客歸妻已卒

酉陽雜俎

邵南夢崔暇女在一廳中女立牀西暇立牀東執紅箋題詩一首授暇曰莫以貞留妾從他理管絃容華難久駐知得幾多年夢後一歲暇妻卒

續百陽雜俎

故諫議李行修娶王氏後暴亡李悲慟有秘書衛隨語曰君欲見夫人奚不問稠桑王老至稠桑驛問王老引至坡側曰汝但呼妙子傳語九娘子令見亡妻果至涕泣相見

定命錄

桑乞妻臨終執乞手云我死爲當婚否乞言不忍也服竟更娶白曰見其死婦語之云君先結誓云何負言以刀割其陽道

異苑

樊若水女才質雙盛愛鍾輻之才而妻之輻入洛中
甲科得意不還攜一女僕曰青箱過蒲城痛飲而卧
青箱侍之是夕夢其妻出一詩爲示怨頗深詩曰楚
水平如練雙雙白鳥飛金陵幾多地一去不言歸夢
中懷愧亦答一詩曰還吳東下過蒲城樓上清風酒
半醒想得到家春欲暮海棠千樹欲凋零旣寢頗厭
之因理歸裝將至采石青箱暴卒匆匆槨葬于一新
墳之側急圖到家則門巷空閨妻已亡數月矣親友
攜至葬所卽青箱槨葬之側新墳也惟海棠數枝方
謝正合詩中之句乃拊膺長慟

江南野錄

常山神祠中題云茶蘼香夢怯春寒翠掩重門燕子
閒敲斷玉釵紅燭冷計程應說到常山此鄭亦山詩
也聞其題詩之夕妻在家亡蓋斷釵識也

環溪詩話

有軍卒妻生子未周死既殯葬輒夜歸乳其子卒與
語則不應如是比夜而至卒懼且疑曰是未必果亡
妻或鬼物所爲不去必害兒乃密置刃席下是夜復
至舉刃逆之應手而滅明旦視血蹤尋至妻墓有屍
伏于冢上屍之狀貌衣服宛然亡妻也發冢驗之棺
空無物

睽車志

姚氏兄弟同居弟婦卒弟獨與小兒同室處焉家人

聞其室中夜與婦人笑語兄意其召外婦人也責之
弟曰夜所與言者亡婦耳兄詢其故則曰婦喪踰月
卽夜叩門曰我念兒無乳至此因開門納之果亡婦
遂徑登榻接取兒乳之自是數來兄乃持大刀夜伏
于門左果有挑門而入者兄盡力刺之大呼而去旦
視之流血塗地兄弟共尋血蹤至墓所則弟婦屍橫
墓外而死矣開其墓惟空棺耳

鐵圍山叢談

劉元素內子朱賢善事其夫元素作柳眼詩云青眼
初垂已可知精神渾在豔陽時只因嫁得東君後兩
淚相看是別離後數日妻亡蓋詩讖也

竹坡詩話

李山甫妻亡踰月所居樓梯忽軋軋有聲少焉妻至
李初疑怖至則忘之矣語笑就枕若平生歡曉去夕
來久之李謀復娶妻遂泣別

夷堅志

某官妻死既再娶矣一日亡妻見形如平生某執其
手則堅冷如冰鐵火之後妻忽夢其先祖云汝夫前
妻爲恠乃陰府失收耳今已捕獲

清尊錄

江西宋氏女美而文嫁鄧公輔有子矣而女卒臨絕
訣鄧詩曰崑山片玉本無瑕女子生來願有家誰料
中途妾薄命莫教兒子衣蘆花

焦氏說

嘉定一民家婦平日未嘗作詩臨終書一絕與其夫

悽惋可誦當時二八到君家尺素無成愧泉麻今日
對君無別語莫教兒子衣蘆花

六節

楊筠湄締婚劉氏未娶而劉夭筠湄書齋夜讀有垂
髻女子碧襦紅裳含笑款戶曰妾郎君之婦劉氏也
良耦未諧早歸泉壤誼托絲蘿理無幽顯不憚遠叩
書幃以成委身之願筠湄涕泣遮近擁之貞體宛然自此
及夕卽來踰歲乃絕

佩賸

穀城葛生娶妻江氏琴瑟甚篤妻避疾卒葛朝暮悲
思一夕聞窓外彈指聲問之曰妾江氏也感君悼念
願與作幽會耳遂續舊好嗣是每夕必至約載餘忽

悲啼不止曰君新婚伊邇妾從此永訣矣次日果有媒者來而江之踪跡絕

長水日抄

施閨章夢一女子辭別閨章母手抽其髻上簪授閨章曰此女簪有斷痕閨章覺而嘆曰吾妻殆不永矣月餘而妻卒

學餘堂文集

荀粲常謂婦人才智不足論宜以色爲主聞曹洪女有色聘焉容服帷帳甚麗事房歡宴後婦病亡傳般往唁粲不哭而神傷般曰子之娶也遺才而好色此亦易遇何哀之甚粲曰佳人難再得逝者有傾城之色未可謂之易遇痛悼不已歲餘亦卒

荀粲別傳

劉實喪妻爲慮杖之制

晉書

王襲妻亡與諸子並持杖行服

羣書鈎元

孫楚妻亡除服作詩示王武子武子曰未知文生于情情生于文覽之悽然增伉儷之重

經外雜抄

侍御武君喪配斂其遺服櫛珥聲悅于篋月十五日則一出陳之抱嬰兒以泣

韓昌黎集

沈亞之夢入秦秦公幼女弄玉墮蕭史先死公使亞之尚公主館居亞之于翠微宮宮人呼爲沈郎院後一年公主無疾忽卒公追傷不已命亞之作挽歌應教立成亞之將去秦公復命至翠微宮與公主侍人

別時見珠翠遺碎青階下牕紗檀點依然侍人泣對

亞之亞之感咽良久

夢遊錄

劉庭式娶瞽女後瞽女死逾年庭式哀不衰蘇軾問
曰哀生于愛愛生于色今君愛何從生哀何從出乎
庭式曰吾知喪吾妻而已

東都事畧

沈存中晚娶張氏嘗被簪楚拔其髻髮血肉狼籍及
張氏死存中神氣索莫月餘亦卒

著樣齋說

潘岳悼亡詩云望虛思其人入室想所歷又云翰墨

有餘迹又云遺挂猶在壁又云長簾竟空床

潘黃門集

元稹喪妻韋蕙叢作遺恨詩三首有云衣裳已施行

看盡針線猶存未忍開

元氏長慶集

蘇軾詩哀哉魏成君宿草荒新墓魏成君公配王夫

人也

東坡詩注

李元膺喪妻作茶瓶兒詞悼之元膺尋亦卒

冷齋夜話

傅若金妻孫蕙蘭工詩傅集中湘皋煙草綠紛紛淚

灑東風憶細君蓋悼亡作也

清江集

于謙悼夫人董氏詩十一首有云燈昏羅幙通宵雨

花謝雕闌幕地風

節庵存稿

梁龔明日當降婦服今日請客奏妓司直奏之奪俸

一月

晉書

衛寬夫妻死再娶前妻現形爲祟 玉芝堂談舊

不再娶曰不開賸路 公羊傳注

曾參喪妻不更娶人問之曰以華元善也漢王駿妻死不更娶或問之駿曰德非曾參子非華元何敢再娶管寧妻卒知故勸再娶寧曰每省曾子王駿之言意常嘉之豈違本心 韓詩外傳

蜀川張尉之妻死而再生復爲夫婦 仙傳拾遺

李强名妻崔氏暴疾卒忽見夢曰吾命未合絕但形已敗帝命天鼠爲吾生肌膚待七七日盡則生矣果有白鼠出入殯所發其柩有肉焉積四十九日妻則

蘇氏妻素美麗及再生美倍于前

江湖紀聞

康熙戊寅松江村人之妻病死越日復生聽其語則嘉興土音也曰吾何爲至此吾乃嘉興某姓之女年十七尚未適人此非吾家也慟哭求歸舉家驚異其夫試往嘉興察之果有某家女新死遂語其故其兄隨至松視之女相見悲喜述父母年歲并居室箴箴衣飾之類無不脗合懇與其兄歸家衆以爲不可遂公議留之仍爲夫婦焉

述異記

濟寧王姓者與衆進香武當山妻亦欲往夫以道遠艱費難之妻恚而自縊夫驚懼言于衆衆置槨殮之

仍行比至河南忽見其妻在路旁大樹下坐憩以爲鬼也妻曰昨以衆行期稍遲故先行至此相候今當同行胡爲鬼耶遂偕行途中起居飲食無異及歸家指櫬示之曰爾不死所殮者何人妻曰吾實不死曷開視之開視乃空棺耳

池北偶談

唐子昇妻鄭氏無疾而終臨卒時告子昇曰不離君之身後十八年更與君爲親已而子昇年近七十再娶于崔氏多省前生之事後逢一男

獨異志

劉立爲長葛尉其妻楊氏忽一日泣謂立曰我當死以小女美美爲托其夕楊氏卒立罷官寓居長葛十

餘年有縣令邀立往郭外看花令立先去舍趙長官
莊見杏園中婦女數輩內一女年十五六近敗垣間
窺立立入門主人移時方出曰適女子與親族看花
忽中暴疾所以失迎坐未定有一青衣與趙耳語趙
起入內立聞趙嗟嘆聲乃問立曰君前婚楊氏乎曰
然有女名美美乎曰然趙曰女適暴卒而蘇自言前
身乃公之妻適窺見公不覺悶倒立獻歛久之須臾
縣令亦至衆客俱集趙白其事衆咸異之立曰某今
年尚未高願與小娘子尋隔生之好衆共成之于是
成婚而美美長于母三歲矣

會昌解頤錄

耿愚買一侍婢麗而黠踰年矣立于門外小兒過焉
認以爲母歸告父曰吾母乃在某家時其母死旣祥
矣父往殯所視之見棺已開無屍還家攜兒訪之眞
厥妻也妻與叙別繼以泣語人曰此吾夫小者吾子
也耿怒曰去年買汝時汝本無夫有契約牙僧可驗
乃訴諸官迹其從來昏不省憶但云因行至一橋迷
路爲牙媼引去迫于飢餒故自鬻牙僧所言同遂命
其夫以餘直償耿氏而娶其妻

異聞錄

元兵破臨川王氏婦與夫約曰吾遇兵必死義不受
污若後娶當告我果被掠死焉越數年夫以無嗣謀

夏娶議輒不諧因告其故妻夜夢妻曰我死後生某家今十歲矣後七年當復爲君婦明日遣人聘之一言而合詢其生與婦死年月同

靜齋筆記

京東民家生一女三歲能言曰我工部郎中鄭濂婦也甫能行卽出戶覓鄭居鄭聞而迎之蓋八歲矣重堂遶室皆若素遊籠篋之皮香履之存靡不一一指點其處鄭以事怪遣之然問者驚相傳告旋徹內廷上命濂續再世之婚濂辭以年齒甚懸上曰天命也待十三歲而婚濂奉旨屆期成禮伉儷如初

觚勝

靳璠妻死旣斂火化一日於空曠處見婦人獨行漸

近乃其妻也相持悲慟妻曰我旣被焚今有朱氏女
某日當死我當投其體再生君往求婚可再合也至
日果聞朱氏死復蘇云我靳瑤妻也瑤因托媒通意
父母以告其女女曰此我夫也其家竟以歸之

睽車志

寡婦

夏姬九爲寡婦當之者輒死左傳所載已八人矣一
爲后七爲夫人蓋能內使技術老而復少者三字文
士及粧臺記序云春秋之初有晉楚之諺曰夏姬得
道雞皮三少

續箋山房集畧

黔婁死曾子往弔問何以爲諡黔婁妻曰以康爲諡

巴寡婦清得丹穴而擅其利用財自衛不見侵犯始

皇以爲貞婦爲築懷清臺

史記

孔姥塏昔有孔氏婦寡居有子八人自訓以義方漢

哀帝時俱爲郡守

湖州府志

王江州被害謝夫人嫠居會稽太守劉柳聞其名請
與談義夫人素聞劉名亦不自阻乃簪髻素服坐在
帳中劉束襟整帶造于別榻夫人風韻高邁叙致清
雅先及家事慷慨流連徐酬問旨詞理無滯劉退而
嘆曰瞻察言氣使人心形俱服夫人亦云親從凋亡

始遇此士聽其所問殊開人心胸

何氏語林

杜有道妻嚴氏字憲十八而娶居女韡有淑德傳元求爲繼室憲便許之或曰何鄧執權必爲元害亦猶排山壓卵以湯沃雪耳奈何與之爲親憲曰晏等驕侈必當自敗卵破雪消行自有在

晉書

陳遵爲河南太守過寡婦左阿君置酒謳歌醉宿司

直陳崇劾奏免歸

甘露園長著

衡方厚爲董昌齡枉殺方厚妻程氏徒行詣闕救耳

于右銀臺門告夫被殺之冤勅封武昌縣君

唐書

遼太祖卒其所述律氏悉召大將難制者之妻謂曰

我今爲寡婦矣汝等豈宜有夫乃殺其大將百餘人

曰可往從先帝

契丹國志

白氏婦於蘇二十而寡嘗於宅東北爲祭室畫東坡

穎濱兩先生像圖黃州龍川故事壁間香火嚴潔躬

自灑掃士大夫求瞻拜者往往過其家奠之

女世說

林邑國寡婦散髮至老

南史

粵西夫死謂之兒妻人無娶者

順寧志

薄少君妻東沈承妻也承天薄爲詩一百首哭之踰

年值夫忌辰酌酒一慟而卒

名媛詩歸

里婦新寡狂且賂鄰媼挑之夜入其閨闔扉將寢忽

燈光綠黯縮小如豆俄爆然一聲紅焰四射圓如二尺許大鏡中現人面乃其故夫也男女並噉然仆榻家人驚視其事遂敗

澠陽銷夏錄

阮元瑜早亡妻寡魏文帝爲作寡婦詩

詩紀

丁廙被誅其妻作寡婦賦文甚淒怨

讀書叢殘

任子咸妻潘岳姨也子咸卒岳爲作寡婦賦

西晉文

陸卿子有寡婦賦

考槃集

陰喻妻荀爽女名采早寡父母強嫁與郭奕奕以詐疾召采采歸而懷自刃爽執奪不得已到郭氏僞爲歛建四燈請其談奕敬憚之及曙奕出采以左右辦

湯沐浴入室私以粉書扇曰屍還陰氏乃以衣帶自縊而死

後漢書

涼王呂紹被殺其美人張氏年十四有殊色爲尼呂隆逼之美人升門樓墜地卒

涼州記

魏劉氏適封卓僅成婚一夕卓官於平城坐事死劉氏在家忽夢夫亡噫鳴經旬及凶問至遂悲傷憤嘆以死

羣書歸正集

嚴肅溺水死妻袁氏急趨夫溺處尋尸不見遂投水死兩月餘水退漁人于沙際見二尸同處焉

葉苑

薛舜英適張伯豪伯豪卒歸父家父遇元兵死舜英

素讀書仰天嘆曰言年方華盛夫亡父殯二天俱傾
若不幸爲兵所污萬禩莫浣矣何如以皎然之軀從
吾父地下父見而夫亦見乎遂絕脰死

女世說補

章瑜死妻傅氏抱屍號泣三日夜不忍入櫬屍有腐
氣猶依屍呵之冀甦旣入棺至嚙其棺成穴及葬投
其身壙中母強挽以出制未百日母欲奪志遂失所
在明日婢汲井見傅氏倒植井中

輟耕錄

魯氏夫誅氏應遣配自誓必死姑曰夫亡改適悠悠
皆是何至此魯氏曰悠悠之爲非妾志也

女世說

許氏適沈同訓三月而寡閉室自縊死家人啓戶視

之面色如生三日內屋宇汗滴如雨

澤浦志

盧佳娘者李廣妻也婚十月廣卒盧慟絕復甦見廣口鼻出惡血悉飮食之既殮遂自經死

福清縣志

謝公明坐誅婦有殊色給配象奴婦給奴曰待我祭亡夫乃從爾奴信之婦攜祭物至武定橋哭奠賦詩云不忍將身配象奴自攜麥飯祭亡夫今朝武定橋頭死一劍清風滿帝都遂伏劍死

說聽

趙哇兒夫病劇哇兒命匠制巨棺夫歿卽自經死同棺歛葬

元史

焦三歿妻易氏紿匠人曰吾夫遺衣甚多欲悉置棺

中可大其制比殯易乃自經遂同棺葬焉

鄴乘

倪士義與婦楊氏有同穴之誓士義卒楊相地葬之復營一穴于旁命工鑿鴛鴦兩字壙上歸卽自刎遂合葬焉人稱鴛鴦壙

風牘

陶嬰夫死守義魯人欲求之作黃鵠歌曰悲夫黃鵠之早寡兮七年不雙宛頸獨宿兮不與衆同夜半悲鳴兮想其故雄魯人遂不復求

列女傳

徐淑夫死毀形不嫁哀痛傷生

史通

郝嘉賓喪婦兄弟欲迎妹還終不肯歸曰生縱不得

與郝郎同室死寧不同穴

世說新語

張彪妻楊氏有容貌彪遇害章昭達便拜稱陳荀教
迎爲家主楊改啼爲笑欣然意悅請昭達殯彪旣畢
還經彪宅謂昭達曰婦人本在容貌辛苦日久請暫
過宅粧飾昭達許之楊入室便割髮毀面哀哭慟絕
誓不更行

玉唾壺

李德武妻裴氏嘗讀列女傳紀不更嫁書謂人曰不
踐二庭婦人之常安貴而載之書

女世說

鄧廉卒妻李氏守志不二忽夜夢一男子欲求爲偶
李氏睡中不許自後每夜夢見李氏曰吾誓不移節
而爲夢所繞益吾容貌未衰故也乃拔刀截髮垢面

灰身遂不復夢

朝野僉載

劉長卿妻桓鸞女生一男五歲長卿卒遠嫌不歸寧男十五而夭乃刑其耳自誓宗婦愍之曰若家無他意何貴義輕身曰先君五更尊爲帝師男以忠孝女以貞順是以豫刑以明我情沛相王吉上奏題其門曰景行義桓

六帖

後漢書作行義桓鸞

千夫長李某戍天台私調部卒妻郭氏卒拔刀刺李坐死郭誓死不二持兩幼泣曰汝父行死母亦當死兒安依終死耳今賣兒於人情豈得已若天祐兒成歲時以孟酒勺飯酒一杯前則二親不餒矣言訖其

子女亦抱母而號行人皆爲墮淚

山堂瑣錄

寡婦淑喪夫守節其兄弟欲逼嫁之淑與書云昔梁寡不以毀形之病忘執節之義高山景行豈不思齊計兄弟備托學門不能匡我以道雖曰既學吾謂之未也

居家必用事類全書

董京起早亡妻張氏獨守貞操終身不沐浴

女世說補

孫義妻姑婦姑居或見其孤苦問何不嫁對曰餓死

事極小失節事極大

慈菴志

蔡文姬適衛仲道夫亡無子歸寧于家值喪亂文姬没于南匈奴在胡中十二年生二子曹操痛豈無嗣

乃以金壁贖之重嫁董祀

後漢書

扶風馬元正妻尹氏天水人也元正早死其父勸之
嫁尹氏哭指鐵井闌曰此上生花我則再醮三年而
黃芝生于闌上遂嫁爲李嵩繼室尹氏幼好學清辨
有志節以再醮之故三年不言

誠齋雜記

諸葛恢女適庾氏寡誓不重出恢既許江彪乃移家
近之初誑女云宜徙于是家人一時去獨留女在後
不得出江郎暮至女且哭且誓積數宿彪暝入恒在
對床後觀其意稍帖乃詐魘良久不悟聲氣轉急女
呼婢云喚江郎覺彪于是躍來就之曰我隨何預卿

事女嘿然慙情義遂篤

世說新語

京兆韋英卒其妻梁氏不治喪而改嫁仍居英宅英乃白日來歸乘馬將數人至於庭前呼曰阿梁卿忘我也梁氏惶懼舍宅爲開善寺

洛陽伽藍記

余媚娘才婦也適周氏夫亡以介潔自守陸希聲時爲正郎聞其容美而善書巧智無比使行人中善言者媒游說之媚娘曰陸郎中必得兒侍巾櫛須立誓不置側室及女奴則可希聲諾之既娶二年劈牋沫墨更唱迭和甚相愛也無何希聲又獲名姬柳薜英媚娘怨之諭令入家同處希聲以爲誠然既共居畧

無他說希聲他適卽召葬英閉室中手刃殺之碎其
肌體盛以二大合封題云送物歸別墅閹吏異之送
京兆獄媚娘遂就極典

續補侍兒小名錄

宋世名家不以再嫁爲恥如范文正幼隨其母改適
長山朱氏名朱說其長子純佑與王陶爲僚壻純佑
卒陶妻亦亡陶遂再婚范氏長姨

香祖筆記

華亭有民其母再醮生一子及母死二子爭葬質之
官判云生前再醮終無戀于之情死後歸墳難見先
天之面令後子收葬

東阜雜記

吳有婦人已嫁二夫夫復死又將再醮士人嘲詩云

辭靈羹飯哭金錢哭出先天與後天明日洞房花燭

夜三天門下會神仙

七修類稿

以異姓配寡婦曰接脚夫

事物紀原

紫葢苗夫死則妻嫁而後葬曰喪有主矣

尚書經志

再嫁曰媾

書叙指南

附錄

廣中僧有室家者謂之火宅僧

番禺雜記

相國寺比丘澄暉以艷侶爲妻一少年踵門願參梵

嫂暉難之凌晨見院牌書勅賜雙飛之寺

清異錄

河西僧人有有妻者

元史

元時僧妻呼曰房老 在周雜志

僧妻有不作女粧者衣冠悉與僧同 西事珥

陝安邊郡山中僧人俱有室家云深山中恐藏姦宄
有妻子則有家累盜賊亦無可容故也 言僧

南方蠻以女配僧曰師娘有師娘者方許住庵 投荒
雜錄
僧娶妻者不得居寺 雞林記

虛度闍官娶美婦 義山雜集

高公妻呂氏故刺史元悟之女易行婦道 高力士傳

宦官有權位者則得娶婦劉瑜傳常侍黃門亦廣妻
妾周舉傳豎宦亦復取良家女為妻單超傳四侯轉

橫多取良人美女以爲姬妾

言篤

宣廟賜太監王瑾夫人二人正統中太監王義死命
寧喜視其家因掩有其財義妻馬氏奏之成化中太
監龍閨娶方瑛妾許氏爲妻

弁山堂別集

宣德中賜太監陳蕪兩夫人天順初賜太監吳誠妻
見水東日記予按李輔國傳帝爲娶元擢女爲其妻
朱子語類梁師成妻死蘇叔黨范溫皆衰絰臨哭由
是觀之祿人有妻古今所同也

雙槐歲抄

遼史卷四

衞史卷五

東吳王初桐于陽纂述

南豐譚米祥退齋校刊

婚姻門一

婚姻

婚者昏時行禮姻者婦人因夫

白虎通 後漢書注 妻父曰婚 婿父曰姻

冰泮逆女蓋發生之時合婚姻也

荀子注

蛾爲婦女夢見蛾者憂婚也

夢書

午時面熱主有婚姻喜事

夢書大全

夢蟹主婚姻難成

夢林元解

耳熱占酉時主女子婚事

百怪斷經

韓詩女丁夫壬傳世婚注元冥之子曰壬夫娶祝融之女曰丁芊俱學水仙是爲溫泉之神今星命家以丁壬爲淫合其說亦古矣

丹鉛總錄

俗以子午卯酉爲當梁年嫁娶最忌張華少孤貧鄉人劉毅奇其才以女妻焉張著感婚賦云彼婚姻之俗忌惡當梁之在年

言鯖

朱陳村一村惟兩姓互爲婚姻

潛確類書

吳郡有婚姻墩昔有女子送葬道逢書生於此各以目相挑後成婚姻故以爲名

真率齋筆記

郁穆舊婚婦婉新媾皆和美之稱

海錄碎事

凡男以締姻者兩家相謂曰親家親字去聲盧綸作
王駢馬花燭詩云人主人臣是親家

輟耕錄

番俗男女成婚曰牽手

番社采風圖

顏氏有三女叔梁紇求婚父問曰誰能事之小女徵
在曰從父所制遂以歸紇

列女傳

楊雍伯盧龍人有人與石子種之生白璧數雙北平
徐氏有女雍伯欲求婚徐謂媒者曰得白璧一雙可
矣雍伯送白璧五雙遂媾徐氏數年雲龍下迎夫婦
俱昇天今謂所居爲玉田坊

仙傳拾遺

孫破處吳夫人早失父母孫堅聞其才貌欲娶之吳氏將拒焉夫人曰何愛一女以取禍乎

書隱叢說

李郢聞鄰女有容求娶之遇有爭娶者女家曰備錢百萬先至者許之兩家之錢同日至女家無以爲辭復曰請各賦一詩以爲優劣郢乃得之

唐詩英華注

盧徹女有幽閒之德馬暢求之卜曰祥女入門媼御皆喜公姑皆賀

唐類函

欲求婦者取雄雞兩毛燒著酒中飲之所求必得用戊子日此是天地合日故必得

雜五行書

高季迪年十八未娶婦翁周建仲出鴈圖命題季

迪賦曰西風吹折荻花枝好鳥飛來羽翮垂沙澗水
寒魚不見滿身風露立多時翁曰是將求室也擇吉
日以女妻焉

蓬軒雜記

邱文莊少時其父爲求配于黎氏黎不許公作情麗
集言黎女失身辜輅辜輅廣人呼狗音也

聽雨增記

賈復死光武聞其婦有孕曰生女我子娶之生男我
女嫁之

東觀漢記

魏相選裴寬爲婿而魏徙嶺表女已踰笄須下髮爲
尼有一尼自外至曰女福豐厚必有令匹宜北歸及
荆裴賁裴以迎矣

柳玘家訓

盧遐王慧龍妻皆崔浩女也皆孕浩曰可指腹爲昏
北史

韋放與張率皆有側室懷孕因指腹爲昏
南史

解縉胡廣兩家皆有孕成祖命指腹爲婚縉生子廣
生女上與之定聘後縉死于獄子成遵廣欲離婚其
女斷髮自誓曰薄命之婚上所定也誰敢易之及縉
子遇赦還遂爲夫婦
明語林

張起潛夫人劉氏在室時有議姻非其族者父以貧
故將許之夫人對月而泣月英射人忽見桂樹浮空
森發丹葩翠葉諦視愈真久之乃滅
梅花草堂筆談

那馬婚娶最早有子甫離襁褓卽爲畢姻者

廣西通志

顧協少時聘舅女未婚而協母亡免喪後不復娶年

六十餘此女猶未他適協義而迎之

榴園管測

顏延年行年三十猶未婚

南史

展允年將知命妃匹未定各助錢以成婚

李因助婚教

唐鄭致雍未第求婚於白州崔相遠初許而崔門有

禍女入宮至梁開平中女托疾出本家致雍復續舊

好親迎之禮無闕

女世說補

金之始祖面普年六十餘居完顏部部有賢女年六

十而未嫁部人以賢女配始祖

金史

倪氏女許聘陳敏陳從軍不返誤以死聞倪矢志不嫁越五十載而夫歸始成姻禮女年六十一夫年六十八兩人霜雪盈頭人號白頭花燭

曠園雜志

女子四十九陰絕男子六十四陽絕過此爲婚爲野合叔梁紇過六十四娶顏氏少女故曰野合

天祿識餘

魏夏侯曹氏世爲婚姻

魏書計

潘岳作楊仲玉誄曰潘楊之睦有自來矣蓋潘楊世爲婚姻也

北堂書抄

鄭崇本高密大族世與王家相嫁娶

檢齋隨筆

羊鄧世婚

海錄碎事

劉范世爲婚姻

桐陰舊話

亳州出輕紗一州惟兩家能織相與世世爲婚懼他
人家得其法也

老學菴筆記

瑤卿嘗代人撰婚書中有云旣爲管鮑之交復結陳
雷之好客曰管鮑陳雷俱朋友故事不傷於合掌乎
答曰陳雷世世爲婚姻若朱陳也

戊辰雜抄

白敏中始娶已朱紫矣戲其妻曰接脚夫人

真如子
語言

李象登第劉昫以猶女妻之

劉生手鏡

裴筠婚蕭安女問名未幾便擢第羅隱詩曰細看月
輪還有意定知青桂近嫦娥

撫言

蔡君謨娶葛常之祖姑清源君已而赴漳南慕常之
會祖贈詩曰藻思舊傳青管夢哲科新試碧雞才乍
依仲寶蓮花幕更下溫郎玉鏡臺

藝圃琳瑯

盧儲投卷謁李翱尚書翱置於几案問長女及笄見
文尋繹數四謂小青衣曰此人必爲狀頭李聞之乃
納爲婿來年果狀頭及第過殿試徑赴佳期作催粧
詩曰昔年將去玉京遊第一仙人許狀頭今日已成
秦晉會早教鸞鳳下粧樓

南部新書

阮逸娶富家女房緡三千

甲申雜記

趙元淑家徒壁立時長安富人宗連有季女慧而有

色適爲求賢夫乃與元淑連送奴婢二十口良馬十
餘匹加以縑帛錦綺及金寶珍玩元淑遂爲富人

府冊

元龜

鄒鳳家巨富嘗因嫁女邀請朝士往臨禮席備極華
麗及女郎將出侍婢圍繞綺羅珠翠垂曳履釵尤艷
麗者至數百人衆皆不知誰是新婦

獨異志

漢戴良有五女家貧每有求婚輒便許嫁練裳布被
竹筍木屐而遣之

蘇氏家語

晉阮循年三十未有室王敦等斂錢與婚皆名士也
時慕之者求入錢而不得

何氏語林

吳隱之將嫁女謝石知其貧令移廚帳就其家經營
使者至方見婢牽犬賣之此外蕭然無辦

佳言王眉

史癡翁女既笄婚貧不能娶與婿期元夜略具隻雞
斗酒我當過飲至元夜証其妻女觀燈攜送至婿家
留其女一笑而別

靜志居詩話

侯景請娶於王謝上曰王謝門高非偶可於朱張以
下訪之

資治通鑑

關東人與崔盧婚者輒自矜大

時習新語

李敬之三娶皆山東舊族

合璧事類

張說好求山東婚姻與張氏親者皆甲門四姓

國史補

宋若昭以學名家不屑與寒鄉凡裔爲對

六帖

高宗朝以王盧鄭二崔二李七姓恃其族望恥與他姓爲婚乃禁其自姻娶於是不敢復行婚禮飾其女以送夫家

桂苑叢談

鄭德林嘗獨乘馬逢一婢馬前拜云崔夫人奉迎鄭郎鄭愕然婢曰夫人小女頗有容質且以清門令族宜相配敵俄有黃衣蒼頭至曰夫人趣郎迫輒控馬疾行奄至一處婢引鄭郎入館宇甚盛夫人著青羅裙年將四十姿容可愛侍婢八九皆鮮整鄭趨詣再拜夫人曰以鄭郎甲族美才願托姻婭鄭唯唯夫人

命引鄭郎升堂堂上悉以花罽薦地左右施豹脚床
七寶屏風黃金屈膝門垂碧箔銀鈎珠絡長筵列饌
皆極豐潔其酒以銀樽貯之可三斗餘琥珀色酌以
金盃侍婢行酒味極甘馥向暮一婢前白女郎粧訖
乃命引鄭就帳女年十四五姿色甚麗目所未覩被
服粲麗冠絕當時鄭遂欣然成禮女善彈箏篴曲詞
新異越百餘日鄭謂女曰可得同歸乎女憮然曰幸
托契會得事巾櫛然幽冥理隔不遂如何因涕泣交
下鄭審其怪異乃謂夫人曰家中相思乞賜還夫
乃大燕會與別曰後三年當相迎也鄭因拜辭婦揮

淚悲惋以視體紅衫及金釵一雙贈別曰若未相忘
以此爲念鄭出門條忽到家家奴云家中失君已一
年矣視其所贈皆真物也鄭尋其故處惟有大墳旁
有小冢乃崔夫人及女郎墓也後三年見前婢乘車
來迎鄭暴卒

宣室志

山東士人多尚閹閹後雖衰其子孫猶負世望凡嫁
娶必多邀錢幣謂之賣婚

唐書

張敞尚帝姊魯元公主有女呂太后欲爲重親以公
主女配帝爲皇后

漢書

劉璋妻乃費觀之族姑璋又以女妻觀

合璧事類

劉無雙者劉震之女震甥王仙客父亡與母同歸外氏無雙與仙客皆幼稚戲弄相狎震姊疾且重召震約無雙與其子爲婚及姊卒仙客奉喪歸葬服闋飾裝抵京師時震爲尚書租庸使門館赫奕仙客又於牕隙間窺見無雙姿質明艷若神仙中人仙客惟恐姻事不諧遂潛囊得錢數百萬遇舅母生日市新竒以獻雕鏤犀玉以爲首飾舅母大喜仙客乃令老嫗以求親之事聞於舅母舅母曰是我所願也卽當議其事忽值涇源兵亂天子出苑震令仙客先奔而已以妻女續至無何震爲門司所識不肯放出至京

闕尅復後仙客訪舅氏消息忽見舊使蒼頭塞鴻乃
知尚書授僞命官與夫人皆處極刑無雙已入掖庭
矣惟無雙所使婢採蘋在金吾將軍宅仙客哀號欲
紀卽納厚價以贖採蘋後仙客爲富平縣尹累月忽
有使押領內家三十人往園陵備洒掃宿長樂驛無
雙在焉翟車子十乘下訖仙客令塞鴻假爲驛吏烹
茗於簾外至夜深聞簾下有呼塞鴻聲者則無雙也
嗚咽問郎君健否因囑塞鴻明日於東北舍閣子中
紫綳下取書送郎君明日塞鴻果得書送仙客花牋
五幅皆無雙真跡詞理哀切敘述周盡書後有云常

見敕使說富平縣古押衙人間有心人今能求之否
仙客遂訪古押衙奉之一年繪綵寶玉之贈不可勝
絕古生叩之仙客以實告越數日古生往問仙客曰
宅中有女家人識無雙否仙客取採蘋與之一夕更
深聞扣門甚急乃古生也領一簍子入謂仙客曰此
無雙也今死矣後日當活仙客抱入閣子中獨守之
至明遍體有煖氣微灌湯藥遂活古生謂仙客曰比
聞茅山道士有藥服之立死三口却活某使人求得
一丸昨令採蘋假作中使以無雙逆黨賜此藥令自
盡至陵下托以親故百練贖其屍事恐漏上天當

爲郎自刎郎君亦不得更居此言訖舉刃仙客救之
頭已落矣仙客乃歸襄鄧與無雙偕老

劉無雙傳

蘇洵女好學能文適其母之兄子程之才

嘉祐集

姑舅兄弟爲婚在禮法不禁惟西魏文帝時禁中外
及從母兄弟姊妹爲婚周武帝又詔不得娶母同姓
以爲妻妾宣帝詔母族絕服外者聽婚皆偏問之制
也

容齋隨筆

魏袁淮正論口中外之親不可相婚

溫嶠之玉鏡臺此以舅之子娶姑之女也呂榮公夫
人張氏卽榮公母中國夫人之姊之女此以小姨之
子娶大姨之女也

朱善婚姻議

崔浩弟娶李順女又以弟子娶順女二門婚媾魏書

馬融從犖恂遊學博通經籍恂以女妻之後漢書

鮑宣妻桓少君宣嘗就少君父學父以女妻之東觀漢記

李漢少事韓愈辱知最厚愈以女妻之藻軒問錄

葛洪好神仙師事鮑元元以女妻洪霞外塵談

劉聰取劉殷女本非同姓也若劉孝武納叔父義宣

之女而改姓可恥矣宛委餘編

李德裕卒於崖州子孫遂為獠族自相婚配漱石閒談

陳友諒亡二子挈眷逃入深洞自相婚配明紀遺聞

夫餘國妻以宗女魏志

林邑國謂大姓爲婆羅門同姓還相婚姻南史

多摩國婚姻無同姓之別

唐書

秦州囉哩戶自相婚姻

秦襄毅公年譜

高麗王生女以妻兄弟言王姬不當下嫁也

雜林類事

蠻中有舉洞純一姓者婚姻不以爲嫌

桂海虞衡志

王基爲子納王沉女以姓同源異故也

魏氏春秋

朱韞斯誤娶同姓後覺得欲去其婦吳志伊曰王莽

與王所聯姻劉曄與劉歆爲婚非同原也

今世說

任薛王劉崔盧之婚非古也何以眠譜注任薛出黃

帝王劉出舜崔盧出帝嚳

文中子

劉頌嫁女於陳矯矯本劉氏子與頌近親出養于姑
改姓陳氏人或譏之

孔氏雜說

崔巨倫姊明慧有才行因患眇一目內外親族莫有
求者巨倫姑乃爲子翼納之

北史

孫泰姨老以二女爲託曰長女損一目汝可妻其女
弟姨卒取其姊或詰之曰廢疾女非泰何適

據言

呂君聘里中女未行旣中第婦家言曰吾女盲敢辭
呂君曰旣聘而後盲又何辭

后山叢談

劉廷式與鄰翁之女約爲婚契潤數年廷式登第歸
鄰翁已死女病雙瞽廷式使人申前好女家辭以疾

廷式曰與翁有約卒與成婚

夢溪筆談

周恭叔早年登科幼議母黨之女登科後其女雙瞽遂娶焉愛過常人

尹氏言行錄

鄭叔通幼聘夏氏女及長登第而女病啞或勸別娶叔通曰未啞定婚啞而棄之不太忍乎

樂善錄

齊何點隱居絕婚何尚之強爲娶任氏點涕泣求執本心既老又娶孔嗣女雖昏亦不與妻相見別字以處之人莫諭其意張融爲詩嘲之曰惜哉何處士薄暮遭荒淫

南史

晉摯虞貽新婚箴於潘岳潘岳答之

山堂肆考

呂祖謙新婚一月不出閨房人笑而戲焉及出則東萊博議一編成矣

東萊博議跋

鄭軌咏兄弟同婚云棠棣開雙萼天桃照兩花今宵二神女併在一仙家

東林藝簣

崔浩娶郭逸女逸妻王氏每奇浩才自矜得婿俄女亡王氏深爲傷恨復以少女續婚

女世說

馮左藏娶張顯女早世女臨終曰吾妹慈惠可撫諸

孤遂娶之

唐類函

後主小周后昭惠后妹也昭惠后卒立小周后爲繼

室被寵過於昭惠

陸游前唐書

昭惠后殂小周后已在禁中後主詞有剗襪步香階
手提金縷鞋至納后乃成禮而已

馬令南唐書

齊王張全義鎮河陽見李講肅愛其俊異以女妻之
卽賢懿夫人所生王之適女也數歲而亡又以宅姬
所生之女妻之雖非賢懿所出以其聰敏多伎藝王
與賢懿惜憐之過於其姊音樂女工無不臻妙知書
容止殆神仙中人也性賢明有禮節自幼至老無惰
容夫賢封清河郡夫人

洛陽指紳舊聞記

李行脩娶王仲舒女其後女亡行脩夢女曰納小妹
則妾幸矣李遂續王氏婚

合璧事類

劉昱娶趙晃長女早亡而趙氏猶有二妹皆未適人
既而劉公登科晃捐館夫人復欲妻之使媒妁通意
劉曰若云武有之德則不敢爲姻如言禹別之州則
庶可從命蓋不欲七姨而欲九姨也夫人諾曰諺云
薄餅從上揭劉郎纔及第豈得便揀點人家女劉曰
非敢有擇但七姨骨相寒薄遂娶九姨

青箱雜記

歐陽修與王拱辰同爲薛簡肅公子壻文忠公先娶
長女王拱辰娶次女後文忠再娶其妹故有舊女壻
爲新女壻大姨夫作小姨夫之戲

碧溪詩話

宋薛簡肅公五女長適張奇次裔易從次王拱辰次

歐陽公次又適拱辰載于公墓文甚明而詩話等書
皆稱歐陽公兩爲簡肅公壻謬甚矣野客叢書

呂東萊妻韓氏卽韓无咎長女也早亡无咎復以次

女配呂

宋學士集
妻呂祖謙

韓流澗泉日記曰先公以兩女

劉原父再婚歐公以詩戲之云洞裡桃花莫相笑劉
郎今是老劉郎西清詩話

景公有愛女請嫁于晏子晏子辭

晏子春秋

荀羨擬國婚之選不欲連姻帝室乃遠遁

荀氏家傳

白敏中欲以侯溫爲壻妻盧氏曰已旣姓白又以侯
氏子爲壻必爲人呼作白侯耳乃止

洛陽耆紳舊聞
記

鄠帥李公將以愛女妻高越越不告而去

南唐近事

今人於榜下擇壻號壻一新貴少年有風姿爲貴族所慕命數僕擁致其第既至觀者如堵須臾有衣金紫者出曰某惟一女亦不至醜陋願配君子可乎少年鞠躬謝曰寒微得托迹高門固幸待歸家試與妻子商量如何衆皆大笑而散

遼齋閒覽

馮京白鄉選至廷對俱第一張堯佐欲妻以女使擁入其家示以奩具甚厚京力辭之

夢溪筆談

王娘字若瓊松陽女子也生有殊色敏惠絕倫及笄字沈生佐與王娘爲中表未幾張父有違言佐與王

娘私相結納不忍背負佗疾革張折簡于沈以死矢
之沈噓唏長潛遂瞑以死張托疾隱几忽燭影下見
沈郎屬曰若瓊宜自重幸不寒夙盟固所願也張泣
曰所不與沈郎者有如此燭語絕不見張悲絕从乃
甦曰郎舍我乎遂得陰疾以卒父媼哀其志與沈合
窆于附郭之楓林

王詔張玉娘傳

萊州閭閻與柳某善有腹婚之約及誕問得男曰自
珍柳得女曰鸞英遂結夙契柳仕至布政而瀾止歲
貢以死家貧不能娶柳欲背盟鸞英泣告其母以死
自誓母白于父父佯應之鸞英度父終渝此盟乃密

懇隣媼往告自珍妾有私蓄請以某日至後園持歸
姻事可成遲則爲他人先矣自珍聞之喜甚遂與其
師之子劉江劉海言之江海設酒賀自珍醉之于學
舍兄弟如期詣柳氏鸞英倚園門以望以物付之而
小婢識非自珍曰此劉氏子也鸞英詈曰狗奴何以
詐取吾財速還則已否則告官江海恐事洩遂殺鸞
英及婢而去自珍夜半醉醒悔失約急詣柳氏黑夜
直入園中踐血屍而躡嗅之腥氣懼而歸衣履沾血
達曙柳氏覺女被殺而不知主名官爲遍詢隣媼遂
首女約自珍至血衣尚在不容置辯論死會御史出

巡至郡夢一女子泣曰妾柳鸞英身爲賊劉江劉海
所殺反坐吾夫幸公哀辯此獄妾死不朽明旦召問
自珍自珍具述江海留飲事卽捕二兇訊之叩頭具
服誅于市而釋自珍爲女生坊以表之自珍後登鄉
薦人作釵釧傳奇

湖海樓奇

南昌李喬授徒于湖廣聘段氏女嘉靖壬午喬歸應
試欲娶女偕歸而段婦忽中變謂喬固窶人失館卽
飢矣奈何捨愛女適他省又不可背盟遂以質女與
之喬歸鄉會聯捷官刑部久之擢守成都便道還鄉
過湖省餽遺段父母甚厚而爲禮亦甚恭段女適蕭

姓子敗蕩日貧而羨賈者擁高華膺官誥鬱鬱病卒
而思雜錄

晉盧充獵見一麋逐之不覺遠忽見里門如府舍充
前問之門者曰少府也充便進見少府展姓名酒炙
數行崔曰近得尊府君書爲君索小女婚故相延耳
卽舉書示充充見父手迹便歔歔無辭崔卽歛內令
女郎莊嚴與充共拜爲夫婦三日見崔崔曰君可歸
矣女有娠生男當以相還生女當留自養送至門執
手零涕復致衣一襲被褥一副充上車去如電追須
臾至家家人推問知入崔少府幕俱惋而已居四年

三月三日臨水戲忽見二犢車乍浮乍沒既上岸見
崔氏女與三歲男兒共載其後車則少府也充往問
訊女抱兒還充又與金盃并贈詩曰煌煌靈芝質光
麗何猗猗華艷當時顯嘉異表神奇含英未及秀中
夏羅霜萎榮曜長幽滅世路永無施不悟陰陽運哲
人忽來儀會淺離別速皆由靈與祇何以贈與親金
盃可願兒愛恩從此別斷絕傷肝脾充取兒盃及詩
忽不見二車處將兒還四坐謂是鬼魅僉遙吐之形
如故問兒誰是汝父逕就充懷衆初怪惡傳省其詩
慨然嘆死生之元通也充詣市賣盃高舉其價不欲

速售冀有識者歛有一老婢問充得盥之由還報女之姨姨曰我甥崔少府女未嫁而亡以金槨著棺中女字溫休溫休蓋幽婚也其兆先彰矣

孔氏志怪

唐獨孤穆遠祖盛爲隋將殉難江都後穆投大儀宿爲一青衣導至一所見一女年可十三四姿韻絕麗自謂隋清河縣主備述盛與已罵賊先後殉難狀且贈穆長篇有曰君子秉祖德方垂忠烈名求義若可托誰能抱幽貞吟竟嗚咽不自勝有言獨孤冠冕盛族宜爲佳偶者女曰本以獨孤忠烈家欲一見吐幽憤耳豈可以塵土之質相污穆曰願云求義若可托

誰能抱幽貞女微笑曰亦大強記遂爲羣婢送入卧
內如人間儀

正思齋雜記

劉曠盡眠間有女郎颯然至自說東海何氏八歲而
夭于今十歲應爲君妻故來修好智瓊杜蘭香咸我
曹也婢名採薇奴名邊羅

續補角兒小名錄

嘉靖甲子福清韓夢雲過石湖山見道幣哀而掩之
是夜宿書舍一童子炊屏投刺曰娘子奉謁俄有麗
人立燈下歛衽載拜謝掩幣之事問其家世曰楚人
也姓王氏名秋英字澹容元至正間從父之任遇寇
石湖山投崖而死今得與君遇亦夙緣也遂薦枕席

生還家英復遣童子遺詩于生明年寒食生攜雞黍
奠英墓上少頃英至藉草痛飲謂生曰妾懷君之子
將免身矣當食以生人乳少許乃可育於人間也請
從君而歸乙丑四月果產一子生覓人乳食之矣復
謂生曰神奇之事人多駭焉兒育于君恐不便妾當
歸楚寄兒楚人後十八年圖相見也遂將兒攀瓦升
屋而去萬歷壬午遺書招生曰兒寄湘陰朱黃橋家
亟往覓之生遂抵湘陰叩朱氏朱氏言歲乙丑有神
女扣門以白布裹兒題血書曰閩人韓夢雲子後十
八年當來召其是乎父子抱持慟哭遂更韓姓將發

英復至偕歸閩踰年別生曰緣盡矣揮淚而逝

榕陰新檢

晉廣州太守馮孝將兒名馬子夜夢女子年十八九言是前太守徐立方女不幸早亡却應爲君妻既覺見床前地髮髻如人初與地平漸漸額出次頭面出又次肩項形體盡出容態言語奇妙非常遂與寢息每誠云我尚虛爾得本命生日當出乃具教馬子出已之方法而去馬子至日掘棺開視女體宛如生徐徐抱出著氈帳中養護之兩眼始開漸能語漸能行人之顏色肌膚氣力悉復常乃遣報徐氏選吉日下禮聘爲夫婦

續搜神記

有士人寓迹三衢佛寺忽有女子夜入其室士人惑之自此比夜而至居月餘士人詰之女子曰我實非人然亦非鬼乃前郡倖馬公之女小字絢娘死于公廨今將還生得接燕寢之久體已甦矣君可具斤鐮夜密發棺我懽然如熟寐君但通耳連呼我小字當微開目卽擁致卧榻飲之醇酒放令安寢旣寢卽復生矣君能從之誓終身奉箕箒士人如其言果再生女曰此不可居脫金握臂俾士人辦裝與俱遁去徙湖湘間數年生二子其後馬倖來衢遷葬此女視殯已損棺空無物大驚問官逮僧鞠之并逮士人女

以書寄父父得書真其亡女筆札遣老僕往視果其
亡女

癸丑志

賈雲華魏鵬妻也初雲華之母與鵬母有指腹之約
後鵬謁賈賈命女結爲兄妹不及前盟兩人因私自
定情後鵬以母喪歸女鬱鬱死二年後有宋子璧女
暴卒復甦自言賈平章女借屍還魂以告賈遂歸鵬
鵬唱隨集

卷五